



JUDICIAL SYSTEM MONITORING PROGRAMME PROGRAMA DE MONITORIZAÇÃO DO SISTEMA JUDICIAL

Komunikadu Imprensa

Periodu : Novembru 2010

Edisaun : 26 Novembru 2010

JSMP Kontinua organiza Workshop konabá Papel Parlamentu Nasional iha Suku Lahane, Aileu

Iha loron 18 fulan Novembru 2010. JSMP liu husi Sub Unidade Programa Observasaun Parlamentu (POP) hetan oportunidade bá dala 5, hodi organiza tan Workshop no desiminasaun informasaun konabá papel Parlamentu Nasional nian iha Suku Lahae, Sub distritu Aileu Vila, Distritu Aileu. Workshop no desiminasaun informasaun ne'e nia objetivu atu habelar informasaun konabá servisu distintus deputadus sira bá povu hanesan dahuluk JSMP/POP organiza iha Distritu, Covalima, Oe-Cusse, Ermera no Manatuto.

Iha workshop no fahe informasaun ne'e equipa hosi JSMP/POP koko esplika kestaun jerál konabá prinsipi Estadu de Direítu tuir Konstituisaun RDTL no Separasaun poderes, papel Parlamentu Nasional (PN), Governu, Tribunál no Prezidente da Repúbliku sira ida-idak nian bá partisipantes sira ne'ebé kompostu hosi feto ema nain 13 no mane hamutuk ema 17 total nain 30.

Luis de Oliveira Sampaio Diretor JSMP hatete katak, hanesan mós treinamento sira seluk, JSMP hala'o ona, JSMP buka nafatin atu hakbesik aan bá povu hodi fahe informasaun konabá sistema lejislativu inklui dezenvolvimentu prosesu halo lei bá povu no lalaok setór sistema judisiáriu iha Timór Léste.

Iha okaziaun ne'e mós JSMP informa konabá atividade, membru Parlamentu Nasional sira iha hahu husi fulan Marsu to'o Setembru ne'ebé publika liu husi buletin POP nian edisaun primeiru to'o edisaun terseiru konabá progresu aktividade distintus deputadus sira konabá prosesu halo lei iha Parlamentu Nasional. Desiminasaun informasaun iha workshop mós inklui situasaun jerál balun iha PN ne'ebe persiza hadia iha futuru. Porezemplu, membru PN ladu'un ativu iha prosesu halo lejislasaun, viola oras servisu no sel-seluk tan. Aleinde ne'e, JSMP mós esplika konabá feriadu membru parlamentu sira ne'ebe naruuk liu durante fulan rua.

Hafoin rona tiha programa fahe informasaun ne'e, partisipantes sira rekomenada pontus bálu mak hanesan tuir mai ne'e:

- Husu bá distintus deputadu sira atu halo fiskalizasaun to'o iha baze iha suku no aldeia tomak inklui sira nia suku ne'ebé to'o oras ne'e seidauk hetan;
- Husu bá distintus deputadu sira atu halo lei persiza hadia iha futuru;
- Husu bá distintus deputadu sira atu halo sosializasaun bá lei sira ne'ebe sira aprova, kompletu ho manual jerál bá autoridade suku sira nune sira kaer hanesan mata-dalan.

- Sira mós husu bá membru Parlamentu Nasional atu férias fulan ida deit, la bele to'o fulan rua.

Tuir observasaun POP nian, pedidu hirak ne'e, akontese mós iha distritu sira seluk wainhira POP halo aktividade desiminasaun informasaun iha sesaun sira liu ba kotuk).

Rekomendasau hirak ne'e hato'ó husi Xefe Sukus no partisipantes sira wainhira rona tiha katak distintus deputadu sira iha kna'ar atu fiskaliza bá programa governu nian iha baze no realidade sira seluk ne'ebe deskobre iha leten.

Hatan bá preokupasaun hirak ne'e, JSMP informa ba partisipantes sira katak JSMP sei halo esforsu hotu ne'ebe posivel atu servisu hamutuk ho distintus deputadu sira hodi kumpri no ezerse sira nia kompetensia tuir lei haruka. Prosesu hirak ne'e bele liu husi organiza sorumutuk ho membru PN sira, halo workshop no konvida reprezentante PN atu koalia no produz publikasaun sira liu husi komunikadu imprensa, buletin mensál no forma aprosimasaun sira seluk atu enkoraza no fo hanoin nafatin ba distintus deputadu PN sira. Informasaun hirak ne'e bele asesu liu husi website www.jsmp.minihub.org JSMP nian no fo bá deputadu sira.

Atu hetan infórmasaun kle'an favor kontaktu:

Luis de Oliveira Sampaio

Direitor Ezekutivu JSMP

Diresaun e-mail: luis@jsmp.minihub.org

Landline: 3323883